



GIGA-OZHITOOMIN GE-IZHICHIGEYENG JI-MINOSEG GEGOOYAN

PAYATE ISHIKIISHWEWIN MAMAW TIPACIMOWIN


Ekii'oshipihikatek kacakosich kiisis 2026



Marten Falls First Nation Anishinaabeg, Odaanikanag giga-wiiji'igoomin ji-minoseyang—weweni ji-gashki'oyang ingoji wii-izhaayang, ji-gashkitooyang ji-mawadisidiyang gaa-gii-bwaaniwitooyang. Giga-wiiji'igoomin gigashkitoomin waa-izhichigeyang gegoo, dibishkoo aakoziwigaming wii-izhaad awiya, giga-wiiji'igoomin gegoo waa-izhichigeyang ezhi-anishinaabewiyang. Mikana giga-wiiji'igoomin ozhichigaadeg Miikana giga-mikaaming anokiiwin.

Giga-gikendaamin ji-meshkojiseg gegoo—dino anokiiwinan, weweni ji-ganawendamang anishinaabe miinigoowiziyang, ge-onji-mino-bimaadiziyang—Gikendaagwad/ Ge-izhi-meshkojinaagwak Gidakiiminaang. Gakina awiya omaa da-wiiji'igoowizi.

Miinawaa giga-oko-wiiji'idimin waabandiyang, giga-gashkitoomin ji-izhaayang wii-waabamang mashkikiwinini, ji-mikamang anokiiwinan, ji-oko-wiiji'idiyang owe mino-bimaadiziwin. Dibishkoo owe, ji-gashkitooyang ji-mino-bimibizoyang ji-mikaming ji-mino-bimaadiziyang gaye gikinoo'amaadiwigamig, ji-mikamang anokiiwinan ji-wiidoowangwaa gidiniwemaaginaang. Miinawaa, da-naagwad gegoo ge-meshkojiseg owe apii gaa-izhi-bimaadiziyang, maagizhaa da-meshkojinaagwad gida-anishinaabewitwaawininaan omaa Gaa-danakiyang. Maagizhaa da-zanagad awiya da-andawendamowaad waakaa'iganan omaa Gidakiiminaang. Maagizhaa da-azhe-giwwag Ishkoniganing.



Dibaakonindiwin gaye Maagizhaa Da-izhise

Mazina'igan Da-ozhichigaade Minik Gegoo Waa-izhichigeyang da-naagwad aaniin ge-izhichigemagak miikana ozhichigaadeg omaa Marten Falls First Nation, weweni ji-ganawenindiyang gidaa-anishinaabewitwaawininaan miinawaa mino-bimaadiziwin. Giga-wiiji'igoomiin weweni ganawenindimang gidaa-anishinaabewinitwaanin wenji-mashkawaadiziyang. Weweni giga-naanaagajitoomin Gidakiiminaan, giga-waabandaamin aaniin ezhichigemagak omaa gidakiiminaang, naagaj gii-izhichigemagak Miikana. Owe bangii gaa-ozhibii'igaadeg ji-dazhinjigaadeg Marten Falls First Nation gaye Aroland First Nation onowe ishkoniganan jaajigaya'ii ayaawan mii omaa ge-enamog miikana.

Marten Falls First Nation Ishkonigan gaye Aroland First Nation Ishkonigan Zhaaganaashii Ogimaa ogii-kaganoonaan Anishinaabe gikendamowaad eyaagin Gaa-manajichigaadegin Local Study Area Omaa Miikana gaye ogii-dazhindaanaawaa gaye nibi ge-wanishkwechigemagak andawenjigewin.

Oga-minjimendaanaawaan Anishinaabe Gagiikwewinan gaye izhitwaawinan ogowe gaa-miikanaagewaad mii owe gechi-apiitendamowaad anishinaabeg.

Ge-izhichigaade Miikana

Apii ozhichigaade miikana, ge-onji-minosegin gegoo omaa Marten Falls First Nation, Aroland First Nation gaye aanind omaa gaa-ayaawaad, da-ayaawan anokiiwinan omaa. Anishinaabeg oga-ayaanaawaan ge-inanokiiwaad, mii omaa gashkijigewaad onowe anokiiwinan. Ayaagin anokiiwinan da-bi-azhe-giiewewag agojii-ishkonigan ayaawaad—nawaj geyaabi da-ozhichigaadewan waakaa'iganan, gaawiin igo aapiji gegoo waakaa'igan o'apii. Da-ayaa go gegoo ge-onji-minosewaad anishinaabeg gegoo da-biijigaadewan omaa Ishkonigan dazhiikigaadeg miikana, geget wiin igo gegoo da-naniizaanad, niibiwa awiyag oga-aabajitoonaawaa miikana miikwamiing gaye dayinamon ji-biijigaadegin waa-aabadakin.

Maagizhaa da-wanisin aanind gegoo gidinwewininaan gidishitwaawininaan dazhiikigaadeg miikana, bakaan inanjugewin, da-wanishkwejigaade gaa-dazhi-andawenjigeng nibi wiisiniwin maagizhaa da-wanishkwejigaadewan, anishinaabe da-wiisini da-wanishkwejigaade. Nawaj adaawe wiisiniwin oga-miijinaawaa mii owe ge-izhiseg awiyag da-maadanokiiwaad bakaan inanjugewag. Aanawi da-mino-bimaadiziwag gashkijigewaad, maagizhaa giga-maanikaagon gegoo inanjugewin, gemaa gaye oga-aabajitoonaawaan maji-mashkikiwan, gemaa gaye maji-bimenindiwin onzaam da-baatayinowag geyaabajitoowaad miikana.

Gabeya'ii dayaabadad i'i miikana (Weweni Ji-ganawenjigaadeg Miikana Ji-minomong)

Niibiwa gegoo da-ayaan ji-naagwadoon apii giishichigaadeg Miikana. Aanind awiya da-bi-azhe-giiewegoziwag gii-kiizhichigaade miikana Marten Falls First Nation. Anokiiwinan da-ondinigaadewan gemaa gaye gegoo giga-ozhitoon ge-onji-gashkijigeyan, giin igo gegoo ge-dibendaman. Maagizhaa giga-noondesemin waakaa'iganan gaye wiiji'idiwin.

Miikana giga-wiiji'igoomin ji-ondinamang geyaabajitooyang ji-ozhigeyang onowe waakaa'iganan. Miikana giga-wiiji'igoomin miziwe ji-babaa-izhaayang, giga-dazhiikaamin gimiiingoowizinaanin gaye ge-inanjigeyang, da-ayaawag ge-wanishkwekamigiziwaad endazhi-giiwoseng, nawaj gawanezimin noopimiing wiisiniwin.

Miikana ozhichigaade da-ayaawan ge-dazhi-wiikondiyang, nawaj maawiin oga-adaawenaawaan gemiijiwaad nibi gaye wiisiniwin maagizhaa bakaan inendaagwad, oga-bagidendaanaawaa anishinaabe wiisiniwin. O'owe miikana da-ayaawan ge-onji-mino-bimaadiziyang, nawaj giga-bimaadiz. Maagizhaa gegoo, giga-maanendamogonaan, giga-gwiinawendaan agwajiing bimaadiziwin gaye maagizhaa awiyag da-maji-izhiwebiziwig. Maagizhaa baatayinadon maji-mashkikiwan / gaye minikwewin ge-biindigeshkaagin Martin Falls First Nation, mii owe ge-onzaami'owaad. Endaso-biboon awiya da-wisagishinoog mii owe ge-onji-giiyizhaang aakoziwigamigong.

Inaakonigeiwinan

Inaakonigewin da-ozhichigaadewan omaa ishkoniganing gegoo ge-onji-maazhisesiwang. Da-ayaawag ge-ogimaakandamowaad izhichigewinan omaa Marten Falls First Nation, Aroland First Nation gaye aanind ishkoniganan, mii owe ge-onji-gikenindiyang oko-wiiji'idiwin. Mii omaa ge-onji-wiiji'indwaa ge-miikanakewaad MFFN Community Access Road Project da-mino-wiiji'idiwig.

Mii owe aanind izhichigewin:

- Da-gikino'amaawaawag Anishinaabe Dakoniwewininiwig miiwig ogowe ge-wiijitwaawaad andawenjigewin agwaakwa'igewin da-naagwadoon bakaan awiya omaa ji-bi-andawejigesigwaa;
- Agwajiishkoniganodaawag ge-anokaadamowaad, miikana wiinawaa oga-ozhitoonaawaataawaad gaawiinon omaa ishkoniganing da-daasiwig
- Ishkoniganing anishinaabeg nitam da-anokiiyaawag; gaye
- Da-dibaadonde bimiwichigaadegin waa-anokaagewaad endaso-giizhig.

Da-giigiyaawag, gaa-maanamanji'owaa jibwaa-anokii'indwaa, mazina'igan da-ozhichigaade ji-ayaasinoog onjikidaadiwin mii owe ge-onji-minosegin anokiiwinan, maagizhaa da-ayaa ge-maanikaagoyang, gemaa gaye da-ombiigad apane, maagizhaa endaayan da-mamaajise, gaye oga-ganawaabandaanaawaa ji-maajitoosigwaa.

“ Marten Falls First Nation apane onandawendaanaawaa anishinaabewichigewinan, gewiinawaa ji-gagwendaagoziwaad benii’igamog gichi-miikana enigokwaag zhaaganaashiiwaki. Awashime gegoo inendaagwad owe miikana—ge-ani-onji-gikendaagoziyang gegiinawind.

– Chief Bruce Achneepineskum.

”



Maagizhaa Ge-izhi-meshkojisegin Gegooyan

Aanawi ozhichigaadewan, inaakonigewinan maagizhaa dash gegoo da-wanichigewag. Aanind gegoo da-minosewan, oga-gashkitoonaawaan endawendamowaad, gaa-ayaanaawaan anokiiwinan gaye bangii gegoo da-inangindewan. Mii owe miikana ge-onji-gashkitooyang ingoji wii-izhaayang, giga-wenjitoomin wiisiniwin, giga-ayaa anokiiwin ji-mino-bimaadiziyang.

Maagizhaa ingoding awiya oga-maazhidoodaagon miikana, maagizhaa giga-wanendaanan gidanishinaabe miinigoowiziwinan, gaawiin giga-miijisiin noopimiing wenji-wiisiniwin, da-baatayiinaad maji-mashkiki, da-ayaa maazhidoodaadiwin ayaagin maji-mashkikiwan gaye minikwewin.

Gegooyan Ge-inakamikagiban

Bagamamo miikana nawaj geyaabi gegoo da-ani-izhichigem naagaj. Miiwan onowe gaa-waabandamang ge-izhisegiban gegoo, aanind awiya dazanizigoziwag ingoji wii-izhaawaad, maagizhaa giga-waniwendaan gidanishinaabewitwaawinan, gaye noopimiing ondanjigewin, aanind awiya da-ojaanimendamoo, maagizhaa awiya miigaadiwag, maagizhaa gaye da-wanishinoog ikwezensag.

Miiwan onowe dazhinjigaadegin; da-gikinoo’amawaawag bimaaji’idiwin; da-naanaagajichigaade inanaamowin, gaye nibi, miinawaa mitakamig, ge-apiichi-gizhiwewebidegin gegooyan gaye ji-ozhimawaad awesiinyag, mazina’igan da-andawendaagwad ji-ozhibii’igaadegin ge-andawenjigaadegin.

Inaakonigewinan da-naanaagadawaabanjigewan, gaa-miikanaagewaad weweni da-wiijitwaawag onaanaagadawaabandaanaawaa ezhitowaad aki.

Da-ayaawag ge-wiijitwaawaad gegoo ezhi-maazhichigekamigak. Wii-wiijitwaawag mii owe ge-izhiseg apii dazhiikamowaad miikana, gakina gegoo oga-naanaagajitoonaawaan ge-izhi-minose gegoo, weweni oga-naanaagajitoonaawaan ge-ezhiseg minoseg gegoo.



Mii Owe Minik

The Marten Falls First Nation Community Access Road ji-onjiigin anokiiwinan, gakina awiya gaa-ayaawaad ge-onji-minosewaad Marten Falls First Nation miziwe. Gegoo da-minosewan, gemaa gaye da-maazhisewan gegoo maanoo dash igo niwiijitoomin. Ayaagin mazina'igan inakonigewinan mii omaa gakina gegoo ji-naanaagadawaabanjigaadegin, Giga-wiiji'igoo ji-wanendiziwan gidanishinaabewitwaawin, gakina awiya ji-mino-ayaad ji-mino-ayaayang—weshki-bimaadiziwaad ji-gikendamowaad wenjiiwaad. Miikana giga-wiiji'igoomin nawaj geyaabi ji-gikendaasoyang, eniwendiwaad ji-waabandiwaad, anokiiwinan, giishpin waabamad mashkikiwinini, giga-ayaan wiisiniwin, giizhoote waakaa'iganan, oko-wiiji'idiwin.

“

Omaa ishkoni-ganing, gii-sanagadoon gegoo izhichigewinan— gaawiin aapiji gegoo gii-ayaasinoon waakaa’iganan, onjida apane ogii-onzaanaawaa nibi, gii-sanagendaagwad, oshki-aya’aag gii-kwiinawizhichigewag, gaye niibiwa gii-inagindeg wiisiniwin gakina gegoo. Mii owe gaa-onji-meshkojichigeyang. Apane ezhi-ningo-biboon da-onjiimagad gegoo izhichigewinan, mii omaa ge-onji-wiiji’igoowiziyang ezhi-andawendamang.

– Chief Bruce Achneepineskum.

”



Awashime na kiwiikikentan?

Giishpin nawaj geyaabi gegoo wii-gikendamang, weweni gidaa-agindaan ji-gikendaman Aaniin Gemeshkojishkaag / Gidakiiminaang Mazina’igan.

Kekanonach Wiintamakewinan

Kinantomiko ima cishayan akwaaahkiink tashiikewinik miikana kapimanokiitamowach anapii piko wiikakweteyan kayema wiipakitinaman ikitowin.

Piiwapikonk: eaisinput@martenfallsaccessroad.ca

Kitowinik: 1-800-764-9114

Piiwapik: eais.martenfallsaccessroad.ca

